



partii naleraq

Nuuk 7. november 2018  
UKA2018/226  
Hans Enoksen Partii Naleraq

**Naalackersuisut suliffeqarfittut innuttaasunik tapersersortarialinnik suliffissaqartitsisunik nalunaarsugaasut pillugit inatsisissatut siunnersuummik kingusinnerpaamik UKA2019-mi saqqummeeqqullugit Inatsisartut aalajangiiffigisassaattut siunnersuut.**  
(Inatsisartunut ilaasortaq Peter Olsen, Inuit Ataqatigiit)

Inatsisartunut ilaasortaq Peter Olsen Inuit Ataqatigiit, aalajangiiffigisassamik siunnersuuteqarpoq Naalackersuisut suliffeqarfittut innuttaasunik tapersersortarialinnik suliffissaqartitsisunik nalunaarsugaasut pillugit inatsisissatut siunnersuummik kingusinnerpaamik UKA2019-mi saqqummeeqqullugit Inatsisartut aalajangiiffigisassaattut siunnersuut. Matumuunalu saqqummiusaaq siunnersuut Partii Naleqqamiit oqaaseqarfigissavarput.

Nunatsinni innuttaasut sulisinnaasut tamarmik atorluarneqarnissaat, minnerunngitsumillu ilinniarsimasut tamarmik atorneqarnissaat piunasaqaatitaqarfiusumik suliffeqarfiutitsinnut atuutsinneqalernissaa tamakkiullugu ilungersuullugu anguniarlugulu pissasugut Partii Naleqqamiit isumaqarluinnarpugut.

Tassami akuersaaginnarsinnaanngilarput ilinniarsimasut nunaqavissut inuiaqatigiinnut aningaasartuutaasumik ilinniarteriarlugit atorumaneqanngitsut saqqummeriartuinnarmat. Tamannalu soorunami nunatsinni ilagut sulerusukkaluartut mattussorlugit pineqarnerat Partii Naleqqamiit akuerinngilluinnarparput.

Suliffeqarfiutigut nunatsinni aammalu tamarmik suliffeqarfiit nunatsinniittut innutaaqatitsinnik sulisoqarnissaminnut tamakkiisumik akisussaaqataasariaqarput, tassami nunarput inuilu pillugit maaniippat taamaattumik aamma pisussaaffeqartariaqarput nunap matuma ingerlalluarnissaanut minnerunngitsumillu innuttaasut atugaasa pitsaanerulernissaannut suleqataanissaminnut.

Inuit innarluutillit allallu sulisinnaanermikkut killeqartumik ingerlatsisut sapinngisamik amerlanerpaat periarfissineqarnissaanik sulissuteqarnissaaq anertuumik tapersersugassaavoq. Sulinerup pilluarnartuunera amerlasuut misigiuartariaqarparput pisinnaasaagut killeqaraluarpaluunniit, takussarpagullu aamma timimikkut innarluuteqaraluarlutik sulinerummikkut takutitsilluartartunik nersorpagut tuiisigullu pattalaarpagut takutitsilluarpusi tulluusimaarnarusilu.

Inuusuttut meeqqallu siunissami pitsaasumik maligassiussagutsigit takutitsilluarnissarput taakkununga pingaartorujussuuvoq. Sulifeqarnerup pilluarnartuunera ullaakut iterluni misigisimalluni atorfissaqartinneqarluni inunnik amerlanerpaanik pingaartumillu inuusuttunik

misigineqarnissaa inuunerullu suliffeqarluni pillaurartuanik misigittarnissaa tamatsinnut pingaartorujussuummat.

Ilaqarpugut inuttut ajornartorsiuteqartartunik. Ukiorpassuarni ilaatigut sulisimangitsunik, ilaqarpugut ukiorpassuarni angerlarsimaffeqaqngitsunik. Ajoraluartumillu suli amerliartorsorinartunik. Taakkunungalu sullissinerup annertusarlugu nukittorsaaffigineqarnissaa pisortat suliffeqarfiutaanni innuttaasunilu tamakkiuttariaqalerparput, ullaakkut iterluni qilaanaarlutik makittarnissaat suliartortarnissaalu aaqutissiunniarlugu.

Kisiannili tassa sulisinnaassagaanni soorunami pinngitsoorneqarsinnaangilaq toqqissinartumik angerlarsimaffeqaqarnissaq, inoqatigut angersimaffeqaqngitsut sulilersinniassagutsigit pinngitsoorata aamma angerlarsimaffeqaqarnissaat sulissutigisariaqarparput. Tassami naammangilaq unnuisarfinni ataatsimoorfiusuni unnuisittarnissaat. Aamma nalunnigilarput unnuisarfinniittartut suliffittaarunik ingerlaannaq unnuisarfinnik anisinneqartartut.

Tamarmik sulisinnaanissaat anguniarlugu piummaffigalugillu suliffittaarlutillu unnuiffissaruttaramik soorunami paasinarput ilaatigut sulileraluannaq soraartoqartassappat, issittumiippugummi silannarmi inuuffiusinnaangitsumi taamaattumik tamatta angerlarsimaffeqaqarnissarput pisinnaatitaaffiummat inissialiornikkut pimoorussinerulertariaqarpugut.

Taamatut tunngavilersuuteqarluta Peter Olsen Inuit Ataqatigiit, inatsissatut siunnersuumik Naalakkersuisut saqqummiusseqqullugit siunnersuutaa taparserparput, ataatsimiititaliamilu suliarineqarnissaa innersuussutigaarput.